

Shainiwan Lait Baibul Bes

Solt en lait

Mak 9:50; Luk 14:34,35

Methyu 5:14-16

¹⁴“Yumob pipul hu wandi bulurum God, yumob garra jidan jis laiga lait blanga shoum ola pipul langa dijan kantri det trubalawei blanga God.

“Yumob jingabat na. Ola pipul gin luk brabliwei det lait langa det taun weya im jidan ontop langa hil. En im lagijat du wen pipul luk langa yu. Dei garra luk det ekshan blanga yu weya yu bulurum det wei blanga God, en dei garra sabi det wei blanga God brabliwei na.ⁱ

¹⁵“Nobodi kaan laidim lemp en blandim. Yu kaan pudum det lait andanith langa baskit. Yu garra pudum det lemp langa top weya ola pipul garra luk det lait wen dei gowin insaid.^j ¹⁶En im lagijat na langa yu laif du. Yu garra jidan gudbalawei, en wen ola pipul luk langa yu, dei garra luk ola gudbala ting weya yu oldei dumbat, en dei garra gubit theingks langa wi dedi langa hebin.”

Jon 1:2-5

²Wal brom longtaim det Wed bin jidan garram God, ³en God bin meigim ebrijing garram det Wed. Im nomo bin meigim enijing nomo garram det Wed, ⁴en det Wed na bin abum det pawa blanga gubitbat laif, en det laif na bin det lait blanga ebribodi, ⁵en det lait oldei shain langa det dakbala, en det dakbala kaan neba audim det lait.

2 Karinthiyans 4:6

⁶Wal yumob jingabat na. Longtaim God bin tok, “Larram lait kamat en shain brom det dakbala.” En lagijat gin imbin meigim det lait blanga im shain insaid langa wi hat, en det lait bin meigim wi sabi God brabliwei, dumaji wen wi sabi Jisas Kraiss, wi sabi God.^a

Jon 5:35

³⁵En Jon Beptis imbin jis laiga braitwan lait weya bin shoum yumob det trubalawei. En yumob bin gudbinji blanga det lait. Bat oni lilwail yumob bin gudbinji blanga det lait.

Mak 4:21-23

Lemp andanith langa dram

Luk 8:16-18

²¹Wal Jisas bin kipgon dalimbat olabat stori, “Wen enibodi im laidim lemp, im kaan go en pudum det lemp andanith langa dram o andanith langa im bangk. Im garra heingimap det lemp blanga meigim lait.^s ²²En im lagijat du langa det wed blanga God. Wen God blandim det wed blanga im, wal im garra shoum det wed afta. En wen im gaburumap det wed blanga im, wal im garra meigim det wed kamat langa opin afta.^d ²³Wal yumob irrim na. Wen yu irrim dijan stori, yu garra jingabat.”